



REPUBLIKA E KOSOVËS / REPUBLIKA KOSOVA

GJYKATA THEMELORE GJILAN

Numri i lëndës: 2023:233211

Datë: 12.03.2024

Numri i dokumentit: 05442269

NË EMËR TË POPULLIT

P.nr.776/2023

GJYKATA THEMELORE GJILAN Departamenti i përgjithshëm, përmes gjyqtares së vetme gjyqese Mevlide Shabani, me bashkëpunëtoreshen profesionale Albinë Velekinca Sadiku, ne çështjen penale kundër të pandehurit Sh.R. nga Gjilani, për shkak të veprës penale posedim i paautorizuar i narkotikëve, substancave psikotrope ose analoge, nga neni 269 paragrafi 1 të Kodit Penal të Republikës së Kosovës (KPRK-ës), duke vepruar sipas aktakuzës së Prokurorisë Themelore në Gjilan, PP.II.nr...../2023 të datës 30.10.2023, pas mbajtjes të shqyrtimit fillestar më datë 13.02.2024, mori dhe publikisht shpalli, ndërsa me datë 12.03.2024, hartoi këtë:

A K T G J Y K I M

I pandehuri Sh. R., nga babai R. dhe nëna S., e gjinisë D., i lindur me datë, në Gjilan, ku edhe jeton Lagjja “A.”, Rr.”E.. Gj.”,nr...., ka të kryer shkollën fillore, i pa martuar, i gjendjes së varfër ekonomike, me numër personal, shqiptar, shtetas i Republikës së Kosovës.

Ë S H T Ë F A J T O R

Sepse me datë 12.Gusht 2023, rreth orës 21:50 min , në parkingun e QT Agmia , në rrugën Lufta e Gjilanit në Gjilan, i pandehuri Sh. R., pa leje dhe autorizim ka poseduar substancë narkotike, në atë mënyrë që pas një kontrole fizike nga ana e zyrtarëve policor, tek i pandehuri është gjetur substancë narkotike të llojit “Marrihuan”, në sasi prej 0.76 gram. ashtu që i pandehuri me veprimet e tij, pa leje dhe pa autorizim ka poseduar substancë narkotike.

- me çka ka kryer veprën penale Posedimi i pa autorizuar i narkotikëve, substancave psikotrope ose analoge nga neni 269 paragrafi 1 KPRK-së

Andaj, gjykata në bazë të nenit 4,38,39,40,42,43,44,69,70,71 dhe 72 të KPRK-ës dhe neneve 242 dhe 364 të KPP-ës, të pandehurin e lartcekur:

E G J Y K O N

Me dënim me burgim në kohëzgjatje prej **3 (tre) muaj**, ashtu që me propozimin dhe me pëlqimin e të pandehurit dhe në kuptim të nenit 44 të KPRK-së, të pandehurit të lartcekur, dënimi i shqiptuar me burgim i **ZËVENDËSOHET** me dënim me gjobë në shumën prej **300 (treqind-euro) €**, si dhe me dënim me gjobë në shumë prej **200 (dyqind -euro) €**, të cilat gjoba i njëjti është i obliguar ti paguajë , pasi që ky aktgjykim të bëhet i formës së prerë.

Nëse i pandehuri i lartcekur, nuk dëshiron ose nuk mundet ta paguajë dënimin me gjobë atëherë dënimi me gjobë do t'i zëvendësohet në dënim me burgim ashtu që 1 (një) ditë burgim do t'i llogaritet për çdo 20 euro, të dënimit me gjobë.

Në bazë të nenit 269 paragrafi 3 të KPRK-ës nga i pandehuri **KONFISKOHET** substanca narkotike e llojit “Marihuanë”, dhe peshorja digjitale, ku substanca narkotike me peshë 0.76 gram e cila pasi që ky aktgjykim të merr formën e prerë duhet të shkatërrohet nga ana e komisionit të formuar nga kryetari i kësaj gjykate-sektori për ekzekutimin e sanksioneve penale të cilët duhet të përpilojnë procesverbal për shkatërrimin e sendit të konfiskuar dhe të njëjtin duhet t'ia bashkëngjisin lëndës përkatëse.

Obligohet i pandehuri që të paguaj paushallin gjyqësor në shumën prej 20 € (njëzet euro), si dhe shumën prej 20 € (tridhjetë-euro) për kompensimin e viktimave të krimit, pasi që ky aktgjykim të merr formën e prerë, nën kërcënimin e përmbarimit të dhunshëm.

A R S Y E T I M

Rrjedha e çështjes

Prokuroria Themelore në Gjilan, Departamenti i Përgjithshëm, me datë 30.10.2023, ka ngritur aktakuzën me numër PP.II.nr.../2023, kundër të pandehurit Sh. R. nga Gjilani, për shkak të veprës penale, posedim i paautorizuar i narkotikëve, substancave psikotrope ose analoge, nga neni 269 paragrafi 1 të KPRK-ës.

Me datë 13.02.2024, pranë kësaj gjykate është mbajtur seanca e shqyrtimit fillestar në të cilën ishin prezentë prokurorja e shtetit, Leonora Kadriu, si dhe i

pandehuri Sh. R., me ç' rast pas leximit të aktakuzës nga ana e prokurores së shtetit, i pandehuri i lartcekur ka deklaruar se e ka kuptuar në tërësi aktakuzën dhe veprën penale për të cilën akuzohet dhe se nuk ka nevojë për sqarime shtesë ndërsa sa i përket fajësisë i njëjti deklaroi se e pranoi fajësinë për veprën penale e cila i vihet në barrë, andaj i premtori gjykatës që në të ardhmen nuk do të përsëris këtë vepër apo vepër tjetër penale duke kërkuar që ti shqiptohet një dënim më i butë dhe ka propozuar që mundësisht dënimin me burg të ma zëvendësoj në dënim me gjobë. me ç' rast gjykata pas dëgjimit të palëve dhe në pajtim me nenin 242 të KPP-ës ka marrë aktvendim me të cilin ka pranuar fajësinë nga ana e të pandehurve dhe më pas seanca e shqyrtimit fillestar ka vazhduar me deklaratimet e palëve rreth dënimit.

Vlerësimi i pranimi të fajësisë

Gjykata pas mbajtjes së shqyrtimit fillestar në të cilin kanë qenë prezent palët e lartcekura dhe pas dëgjimit të palëve ka marrë aktvendim me të cilin ka pranuar fajësinë e të pandehurit për veprën penale për të cilën akuzohet ngase ka konstatuar se janë plotësuar gjitha kushtet ligjore për një gjë të tillë si në kuptim të nenin 242 paragrafi 1 të KPP-së dhe se pranimi i fajësisë nga ana e të pandehurit nuk është kundërshtuar nga ana e palëve prezentë. Në këtë aspekt gjykata ka konstatuar se i pandehuri e ka kuptuar drejtë natyrën dhe pasojat e pranimi të fajësisë, se pranimi i fajësisë është bërë vullnetarisht nga ana e të pandehurit, se i pandehuri nuk ka qenë i detyruar ose i shtrënguar në asnjë mënyrë që të pranojë fajësinë, se pranimi i fajësisë mbështetet në faktet e çështjes të cilat i përmban aktakuza siç janë: Raporti informues i incidentit nr.2023-CA-....., i datës 12.10.2023, deklaratat e të pandehurit Sh. R., vërtetim mbi konfiskimin e përkohshëm të sendeve, Raporti i testit fushor, fotografi, si dhe shkresat e tjera të lëndës, gjithashtu gjykata me rastin e pranimi të fajësisë nga ana e të pandehurit gjeti se aktakuza lëndore nuk përmban asnjë shkelje të qartë ligjore ose gabime faktike.

Gjendja faktike e vërtetuar

Duke u bazuar në të lartë cekurat, gjykata vërtetoi këtë gjendje faktike: se i pandehuri Sh. R., e ka kryer veprën penale: posedim i paautorizuar i narkotikëve, substancave psikotrope ose analoge, nga neni 269 paragrafi 1 të KPRK-ës, si në kohën, vendin dhe mënyrën e përshkruar si në dispozitiv të këtij aktgjykimi.

Rrethanat që janë marrë për bazë me rastin e shqyrtimit të dënimit

Gjykata me rastin e shqiptimit të dënimit ka vlerësuar se të pandehurit duhet ti shqiptohet dënim me burgim në kohëzgjatje prej 3 (tre) muaj, i cili dënim me pëlqimin e të pandehurit i është zëvendësuar në dënim me gjobë në shumë prej 300 (treqind-euro)€, dhe dënim me gjobë në shumë, prej 200 (dyqind-euro)€, të cilën obligohet ta paguajë nga dita kur ky aktgjykim të merr formën e prerë, ngase duke i marrë parasysh të gjitha rrethanat dhe provat të cilat gjinden në shkresat e lëndës, ky dënim do të jetë i drejtë, në harmoni me peshën e veprës penale dhe përgjegjësinë penale të kryesit, gjithashtu gjykata me rastin e matjes së dënimit ka marrë për bazë edhe rrethanat që ndikojnë në llojin dhe lartësinë e dënimit duke u bazuar në nenet 69,70,71, dhe 72 të KPRK-së, ashtu që rrethanë lehtësuese për të pandehurin gjykata ka marrë faktin se i njëjti ka pranuar fajësinë për veprën penale të cilën i vihen në barrë në një fazë të hershme të procedurës, i njëjti është penduar dhe ka shfaqur keqardhje për veprimet e tij, faktin se i njëjti ka premtuar që në të ardhmen nuk do të kryej vepra të tilla dhe as vepra të tjera penale, ndërsa si rrethanë rënduese për të pandehurin gjykata mori për bazë shkallën e përgjegjësisë penale, rrezikshmërinë shoqërore, e cila vepër penale është në rritje e sipër, dashjen e të pandehurit për ta kryer veprën penale për të cilën është shpallur fajtor siq shihet në piken I të dispozitivit të këtij aktgjykimi.

Duke u bazuar në të lartcekurat dhe në kuptim të nenit 72 paragrafi 1 nën paragrafi 1.3 të KPRK-ës gjykata të pandehurit i shqiptoj dënimin brenda kufijve të paraparë ligjor të paraparë si në nenin 73 të KPRK-ës, gjithnjë duke konsideruar se me dënimet e shqiptuara ndaj të pandehurit mund të arrihen qëllimet e dënimit si në kuptim të nenit 38 të KPRK-ës të cilat konsistojnë në parandalimin e të pandehurit nga kryerja e veprave penale dhe rehabilitimin e tyre, parandalimin e personave të tjerë nga kryerja e veprave penale, shprehjen e gjykimit shoqëror për veprën penale dhe ngritjen e moralit dhe forcimin e detyrimit për respektimin e ligjit.

Vendimi mbi konfiskimin

Duke u bazuar në nenin 269 paragrafi 3 të KPRK , gjykata ka vendosur që t'ia konfiskoje substancën narkotike të llojit “Marihuanë”, në sasi prej 0.76gram.

Vendimi mbi shpenzimet e procedurës penale

Duke pasur parasysh natyrën e kësaj çështje penale dhe gjendjen financiare të të pandehurit, gjykata duke u bazuar në nenin 450 paragrafi 1 të KPP-së, ka vendosur që të pandehurin ta detyrojë ta paguajë paushallin gjyqësor në shumën prej 20 € (njëzete euro) si dhe shumën prej 20 € (njëzet euro) për kompensimin e viktimave të krimit, të gjitha këto pasi që ky aktgjykim të merr formën e prerë, nën kërcënimin e përmbarimit të dhunshëm.

Andaj duke u bazuar në të lartcekura gjykata vendosi si në dispozitiv të këtij aktgjykimi.

GJYKATA THEMELORE NË GJILAN

P.nr.776/2023, me datë 12.03.2024

**Gjyqtarja e vetme gjykuese,
Mevlide Shabani**

KËSHILLA JURIDIKE: Kundër këtij aktgjykimi mund të paraqitet ankesë në Gjykatën e Apelit të Kosovës në Prishtinë, në afat prej 30 ditëve nga dita e pranimit të të njëjtit. Ankesa në kopje të mjaftueshme i paraqitet Gjykatës Themelore në Gjilan